

**INTERNACIONALNI BURČ UNIVERZITET
INTERNATIONAL BURCH UNIVERSITY**



PRAVILNIK O RADU STUDENTSKIH KLUBOVA

RULEBOOK ON THE WORK OF STUDENT'S CLUBS

S A D R Ž A J

I. OPĆE ODREDBE 2

Predmet i definicija	2
Zabrana političkog djelovanja i organizovanja	2
Ravnopravnost i zabrana diskriminacije	2

II. OSNIVANJE KLUBA 3

Procedura osnivanja	3
Oblast djelovanja kluba	3

III. ORGANIZACIJA, PRAVA I OBAVEZE KLUBA 4

Prava	4
Obaveze	5
Finansijska prava i obaveze	5
Statut kluba	6

IV. AKTIVNOSTI I MENTORSTVO 6

Student Activity Center	6
Mentor kluba	6

V. PRELAZNE I ZAVRŠNE ODREDBE 7

Tumačenje	7
Stupanje na snagu	7

Na osnovu člana 130. Zakona o visokom obrazovanju Kantona Sarajevo („Službene novine Kantona Sarajevo“ br. 33/17, 35/20, 40/20 i 39/21), a u vezi sa čl. 22. Statuta visokoškolske ustanove Internacionalni Burč univerzitet – International Burch University, Senat Internacionalnog Burč univerziteta je na svojoj 188. elektronskoj sjednici, održanoj 25.5.2022. godine, usvojio sljedeća

**PRAVILNIK O RADU STUDENTSKIH KLUBOVA
NA VISOKOŠKOLSKOJ USTANOVI INTERNACIONALNI BURČ UNIVERZITET –
INTERNATIONAL BURCH UNIVERSITY**

I. OPĆE ODREDBE

**Član 1.
(Predmet i definicija)**

- (1) Pravilnikom o radu studentskih klubova uređuju se uslovi, pravila i procedure za organizaciju, upravljanje i funkcionisanje studentskih klubova na Internacionalnom Burč univerzitetu – International Burch University (u daljem tekstu: Univerzitet).
- (2) Pravilnik ima za cilj osigurati da studentski klubovi na Univerzitetu djeluju u skladu sa vrijednostima i statutom Univerziteta, promovišući akademski i karijerni razvoj, kulturološku raznolikost i vannastavni angažman studenata.
- (3) Pravilnik reguliše pitanja organizacije i upravljanja studentskim klubovima, uključujući osnivanje, članstvo, finansije, aktivnosti, partnerstva, izvještavanje i ostalo.
- (4) Studentski klubovi koji djeluju na Univerzitetu su odgovorni za poštovanje ovog Pravilnika i rukovode se njegovim odredbama prilikom planiranja i realizacije svojih aktivnosti.
- (5) Studentski klub je grupa koja se sastoji od studenata Univerziteta koja ima za cilj okupljanje studenata koji dijele zajedničke interese, strasti ili ciljeve. Klubovi nude studentima priliku za angažman van učionica, organizaciju različitih aktivnosti, razvoj vještina i društveno povezivanje. Klubovi mogu biti posvećeni različitim interesima i imaju vlastitu strukturu, liderstvo i pravila koja ih vode.

**Član 2.
(Zabrana političkog djelovanja i organizovanja)**

- (1) Na Univerzitetu je zabranjeno političko organizovanje i djelovanje.
- (2) Na Univerzitetu nije dozvoljeno organizovanje ili djelovanje političkih stranaka, niti održavanje skupova ili druga djelovanja koja u osnovi imaju političke ili stranačke ciljeve.
- (3) Predsjednici, podpredsjednici, zamjenici i ostali rukovodioci kluba ne mogu obavljati funkcije u organima izvršne i zakonodavne vlasti, političkim strankama i sindikalnim organizacijama za vrijeme trajanja mandata u klubu.
- (4) U slučaju da jedno od lica iz prethodnog stava pristane na politički ili sindikalni angažman, odnosno prihvati određenu funkciju u izvršnoj ili zakonodavnoj vlasti, prestaje mu mandat izvršne funkcije u Klubu.
- (5) Odmah po saznanju da se lice iz stava (3) ovog člana politički angažovalo ili postalo član upravljanja određene sindikalne organizacije, odnosno da je prihvatilo funkciju u izvršnoj ili zakonodavnoj vlasti, Centar za studentsku aktivnost (u daljem tekstu: Student Activity Center ili SAC) donosi odluku o prestanku mandata lica u pitanju, te je obavezno da preduzima sve potrebne mjere kako bi spriječilo kršenje zabrana iz ovog člana.

**Član 3.
(Ravnopravnost i zabrana diskriminacije)**

- (1) Univerzitet i klubovi u svome djelovanju osiguravaju zaštitu i promovisanje jednakosti bez diskriminacije, ravnopravnost spolova i poticanje inkluzije ugroženih grupa, jednakost u mogućnostima i tretmanu svog osoblja, studenata kao i fakulteta i podorganizacionih jedinica u vršenju utvrđenih ovlaštenja.

- (2) Diskriminacijom će se smatrati svako različito postupanje uključujući svako isključivanje, ograničavanje ili davanje prednosti utemeljeno na stvarnim ili pretpostavljenim osnovama prema bilo kojem licu ili grupi lica i onima koji su s njima u rodbinskoj ili drugoj vezi na osnovu njihove rase, boje kože, jezika, vjere, etničke pripadnosti, invaliditet, starosna dob, nacionalnog ili socijalnog porijekla, veze s nacionalnom manjinom, političkog ili drugog uvjerenja, imovnog stanja, članstva u sindikatu ili drugom udruženju, obrazovanja, društvenog položaja i spola, seksualne orijentacije, rodnog identiteta, spolnih karakteristika, kao i svaka druga okolnost koja ima za svrhu ili posljedicu da bilo kojem licu onemogući ili ugrožava priznavanje, uživanje ili ostvarivanje na ravnopravnoj osnovi, prava i sloboda u svim oblastima života.
- (3) Univerzitet i klubovi ne smiju vršiti diskriminaciju zasnovanu na spolu u vezi sa uslovima prijema, odbijanjem prijema, načinom pružanja usluga i beneficija, isključenjem iz aktivnosti kluba, vrednovanjem dostignutih rezultata u toku rada kluba, jednakim uslovima u stvaranju karijere i profesionalnom usmjeravanju, stručnom usavršavanju i drugim mogućim slučajevima.

II. OSNIVANJE KLUBA

Član 4. (Procedura osnivanja)

- (1) Univerzitet pruža mogućnost studentima da osnuju nove studentske klubove koji će doprinijeti raznolikosti i obogaćenju studentskog života.
- (2) Klub može osnovati najmanje 10 (deset) redovnih studenata Univerziteta koji dijele zajednički interes za određenu oblast ili aktivnosti.
- (3) Procedura za osnivanje novih klubova započinje ispunjavanjem Registracijske forme (engl. *Club Registration Form*) koja je dostupna na internet stranici Univerziteta i SAC-a.
- (4) U Registracijskoj formi se obavezno navode kontakt podaci o odgovornoj osobi, nazivu kluba, lista članova te svrha i kratak opis kluba.
- (5) Centar za studentsku aktivnost je obavezan razmotriti prijavu za osnivanje novog kluba u roku od 5 (pet) radnih dana od dana zaprimanja prijave i obavijestiti odgovornu osobu o ishodu prijave.
- (6) Centar za studentsku aktivnost može donijeti jednu od dvije moguće odluke o prijavi:
 - a) pozitivna odluka - ukoliko je utvrđeno da je registracijska forma uredno ispunjena i dostavljena, da sadrži sve obavezne elemente te da je usklađena sa vrijednostima i statutom Univerziteta;
 - b) negativna odluka:
 - ukoliko je utvrđeno da registracijska forma nije uredno ispunjena i dostavljena, da ne sadrži sve obavezne elemente; ili
 - je u suprotnostima sa vrijednostima i ciljevima Univerziteta, disciplinskim i etičkim kodeksima Univerziteta; ili
 - se podudara sa aktivnostima već osnovanog kluba; ili
 - aktivnosti ne doprinose karijernom i akademskom razvoju studenta; ili
 - mogu naštetiti ugledu akademske zajednice Univerziteta.
- (7) Danom donošenja pozitivne odluke, Klub stiče sva prava i obaveza propisane ovim Pravilnikom i pristupa obavezi donošenja stauta kluba čije odredbe su obavezni poštovati svi članovi kluba.
- (8) U slučaju negativne odluke, podnosilac prijave će biti obaviješten o razlozima negativne odluke.
- (9) Već postojeći klubovi su obavezni obnoviti svoj status aktivnog kluba početkom svakog novog semestra.

Član 5. (Oblast djelovanja kluba)

- (1) Klub se može baviti različitim aktivnostima te ne mora biti vezan za naučnu odnosno umjetničku oblast bilo kojeg odsjeka na Univerzitetu.
- (2) Oblasti interesovanja i aktivnosti kluba moraju biti usmjerene na karijerni, profesionalni i akademski razvoj, a mogu biti, ali se ne ograničavaju na: kuturu i umjetnost, sport i rekreaciju, humanitarni rad i volonterizam, ekologiju i održivost, tehnologiju i inovacije i slično.

- (3) Klub mora biti osnovan i vođen s primarnim ciljem provođenja aktivnosti karijernog i akademskog razvoja, promocije zajedničkih interesovanja, stručnosti i sličnih aspekata ličnog razvoja koji povezuju članove, ali se ne može osnovati samo sa ciljem promocije određenih karakteristika, identiteta ili grupacije studenata.
- (4) Zabranjeno je koristiti klub kao platformu za promovisanje ili nametanje vlastitih političkih, vjerskih, društvenih i drugih stavova.

III. ORGANIZACIJA, PRAVA I OBAVEZE KLUBA

Član 6. (Organizacija kluba)

- (1) Član kluba može biti svaki redovan student na Univerzitetu.
- (2) Članovi kluba mogu biti i zaposlenici Univerziteta.
- (3) Klubovi imaju pravo vršiti selekciju i ograničavanje broja članova pod uslovima definisanim statutom kluba, a u skladu sa odredbama ovog pravilnika.
- (4) Svaki klub mora imati predsjednika čije obaveze će detaljnije biti uređene statutom kluba.
- (5) Prijava na aktivnosti klubova se vrši putem univerzitetske aplikacije *MyIBU* dostupne na *PlayStore Android* i *AppStore Apple* platformi.
- (6) Jedan student može obnašati funkciju unutar samo jednog kluba.
- (7) Maksimalan broj članova, funkcije unutar kluba, način i uslovi biranja članova kao i sve ostale odredbe koje regulišu pitanja članstva i funkcionisanja kluba se detaljnije uređuju statutom kluba.
- (8) Članovi kluba imaju prava na učestvovanje u aktivnostima kluba, pristup informacijama o radu kluba i priliku da izaberu predsjednika kluba u skladu sa statutom.
- (9) Članovi kluba su obavezni da poštuju statut kluba, pravila Univerziteta i vrše svoje obaveze kao članovi kluba.

Član 7. (Prava)

- (1) Klubovi imaju pravo da se slobodno udružuju i okupljaju članove u skladu sa statutom kluba i Pravilnikom, bez diskriminacije ili prepreka.
- (2) Klubovi imaju pravo na slobodu organizacije i vođenja svojih aktivnosti u skladu sa svojim statutom i Pravilnikom, osiguravajući da su u skladu sa vrijednostima i ciljevima Univerziteta.
- (3) Klubovi imaju pravo na slobodu izražavanja i promovisanja svojih ciljeva i aktivnosti unutar granica zakona i internih pravila Univerziteta.
- (4) Klubovi imaju pravo na pravilno i pravovremeno informisanje o odlukama i promjenama koje ih se tiču, kao i pristup relevantnim informacijama i dokumentaciji.
- (5) Klubovi imaju pravo na pristup resursima i podršci od strane Univerziteta u skladu sa postavljenim pravilima i procedurama za dodjelu resursa.
- (6) Klubovi imaju pravo predstavljati Univerzitet prema bilo kojim fizičkim ili pravnim licima uz isključivo odobrenje SAC-a i rektorata Univerziteta, a u cilju sklapanja i implementacije partnerstva između Univerziteta i tog lica.
- (7) Klubovi nemaju pravo koristiti puni naziv Univerziteta „Internacionalni Burč univerzitet – International Burch University“.
- (8) Izuzetno, klubovi imaju pravo koristiti riječ „Burch“ ili skraćenicu „IBU“ u imenu kluba, organizaciji aktivnosti, javnim saopštenjima, društvenim mrežama i svim nastupima prema trećoj strani.
- (9) Klubovi imaju pravo i na:
 - a) korištenje podrške SAC-a za planiranje, promociju i implementaciju programa i aktivnosti;
 - b) promovirati aktivnosti i rezultate kluba koristeći oglasne ploče i ostale lokacije predviđene za oglašavanje na Univerzitetu uz odobrenje SAC-a i mentora kluba;
 - c) korištenje komunikacijskih kanala Univerziteta za promociju aktivnosti i rezultata kluba u skladu sa marketinškom politikom Univerziteta;
 - d) pozivanje eksternih predavača, stručnjaka i mentora da sudjeluju u aktivnostima kluba uz obavijest i odobrenje SAC-a i mentora kluba;

- e) pozivanje i organizovanje posjeta učenika srednjih škola kao i studenata drugih univerziteta da sudjeluju u aktivnostima kluba, uz obavijest i odobrenje SAC-a i mentora kluba; i
- f) korištenje finansijske podrške Univerziteta za aktivnosti odobrene u sklopu plana aktivnosti.

Član 8. (Obaveze)

- (1) Klubovi su obavezni da:
 - a) poštuju odredbe ovog Pravilnika i druge interne propise Univerziteta;
 - b) upravljaju klubom i aktivnostima u skladu sa Pravilnikom, svojim statutom i internim propisima Univerziteta;
 - c) usvoje statut kojim će regulisati osnovna prava i obaveze;
 - d) redovno učestvuju u sastancima organizovanim od strane SAC-a;
 - e) relaziovati najmanje jednu aktivnost na mjesечно da bi zadržao status aktivnog kluba;
 - f) obavijestiti SAC o terminu održavanja aktivnosti 7 (sedam) dana unaprijed putem emaila sac@ibu.edu.ba;
 - g) obezbijede transparentnost u svim svojim aktivnostima i postupcima putem podnošenja izvještaja o realizovanim aktivnostima, vođenju evidencije prisutnih i slično;
 - h) djeluju u skladu s vrijednostima i ciljevima Univerziteta i ne smiju promovisati ili učestvovati u aktivnostima koje suprotno djeluju na te vrijednosti;
 - i) poštuju prava i slobode svih studenata, osoblja i drugih članova univerzitetske akademske zajednice;
 - j) sarađuju sa univerzitetskim službama i podržavaju napore Univerziteta u promociji studentskog života te karijernog i akademskog razvoja; i
 - k) održavaju red na svojim događajima i aktivnostima i preduzimaju odgovarajuće mjere za bezbjednost i dobrobit svojih članova.
- (2) Klubovi su obavezni da blagovremeno izvještavaju o utrošku sredstava koje su dobili na rapolaganja od Univerziteta.
- (3) Klubovi imaju obavezu da redovno obavještavaju javnost o svojim aktivnostima na kanalima komunikacije kluba.
- (4) Klubovi su ohrabreni da sarađuju sa drugim klubovima na Univerzitetu i doprinose raznolikosti studentske zajednice i života.

Član 9. (Finansijska prava i obaveze)

- (1) Klubovi imaju pravo tražiti finansijsku i druge vidove podrške od strane Univerziteta, a u cilju realizacije aktivnosti odobrenih planom aktivnosti.
- (2) U slučaju realizacije neplanirane inicijative za aktivnost koja bi mogla imati veliki značaj za Univerzitet, inicijatori imaju pravo poslati zahtjev SAC-u za finansijsku pomoć uz detaljno obrazloženje zahtjeva.
- (3) Odobrena finansijska sredstva za sve aktivnosti se isplaćuju na transakcijski račun predsjednika ili blagajnika kluba na osnovu pismenog zahtjeva koji se dostavlja najmanje sedam (7) dana prije planirane aktivnosti SAC-u i mentoru kluba.
- (4) Utrošak sredstava se pravda dostavljanjem računa SAC-u u roku od 7 (sedam) dana od dana realizacije aktivnosti.
- (5) Klubovi imaju pravo tražiti finansijsku podršku za svoje aktivnosti iz plana aktivnosti od trećih fizičkih ili pravnih lica, a način prikupljanja, utroška i izvještavanje se obavezno reguliše statutom kluba.
- (6) Svi nastupi prema potencijalnim donatorima, finansijerima i sponzorima moraju biti najavljeni na redovnim sastancima SAC-a kako bi se spriječilo dupliranje zahtjeva za finansijsku podršku od istih fizičkih ili pravnih lica.
- (7) Univerzitet ne snosi odgovornost za način na koji klubovi prikupljaju, troše i izvještavaju o utrošku sredstava prikupljenih od strane trećih fizičkih ili pravnih lica.
- (8) Klubovi imaju pravo organzovati prikupljanje sredstava za planirane aktivnosti kroz nalaćivanje ulaza, prodaju hrane, materijala i na druge slične načine, ali su obavezni zatražiti odobrenje od SAC-a i statutom definisati način upravljanja sredstvima prikupljenim na taj način.

Član 10. (Statut kluba)

- (1) Svaki klub mora imati statut kojim reguliše sva pitanja vezana organizaciju i funkcionisanje kluba kao i plan aktivnosti kluba.
- (2) Rok za donošenje statuta i plana aktivnosti je deset (10) dana od dana sticanja statusa aktivnog kluba i dostavlja se SAC-u na pregled i evidentiranje.
- (3) Statut kluba je dokument koji definiše osnovnu strukturu, svrhu, pravila i procedure rada kluba, a treba sadržavati:
 - a) ime kluba koje jasno identifikuje klub;
 - b) ciljeve i svrhu kluba, uključujući njegovu misiju i viziju;
 - c) uslovi i procedure za članstvo u klubu, uključujući prava i odgovornosti članova;
 - d) strukturu kluba koja uključuje predsjednika, odbore, članove i druge organe kluba; i
 - e) ostale odredbe relevantne za organizaciju i vršenje aktivnosti.

IV. AKTIVNOSTI I MENTORSTVO

Član 11. (Student Activity Center)

- (1) Sve studentske aktivnosti vezane za klubove su u nadležnosti SAC-a koji ima obavezu da pruža pomoć i podršku svim klubovima.
- (2) Obaveze SAC-a su:
 - a) podrška u planiranju i implementaciji aktivnosti;
 - b) podrška u internoj i eksternoj promociji klupskih aktivnosti;
 - c) zaprimanje i evidentiranje aplikacija, zahtjeva i izvještaja;
 - d) koordinisanje rada klubova sa ciljem da spriječi preklapanje aktivnosti te omogućiti razmjenu iskustava između klubova;
 - e) održavanje redovnih sastanaka sa predsjednicima klubova;
 - f) organizacija radionica, edukacija, seminara za vršitelje funkcija u klubovima, sa ciljem efikasnije realizacije aktivnosti i funkcionisanju kluba;
 - g) podržavanje klubova u razvijanju poslovnih ideja, njihovoj pripremi za interna i eksterna *start – up* takmičenja;
 - h) koordinisanje rada mentora kluba; i
 - i) vrednuje aktivnosti studenata prema izvještajima mentora kluba u skladu sa pravilima o stipendiranju na Univerzitetu.
- (3) U svome radu, članovi SAC-a odgovaraju generalnom sekretaru i prorektoru za nastavu i studentska pitanja.

Član 12. (Mentor kluba)

- (1) Klubovi su obavezni imati mentora kluba iz reda članova akademskog ili administrativnog osoblja Univerziteta, a čija je ekspertiza bliska polju djelovanja kluba te da svojim mentorstvom mogu dobiti njegovom radu.
- (2) Predsjednici kluba mogu predložiti mentora iz reda članova akademskog ili administrativnog osoblja Univerziteta za kojeg misle da bi svojim znanjem i kompetencijama pomogao aktivnostima kluba ali odluku o imenovanju mentora donosi rektorat Univerziteta.
- (3) Mentori imaju pravo davati konstruktivne kritike i smjernice za rad te pomoći radu kluba na bilo koji drugi način ali bez prava donošenja konačnih odluka o procesima i aktivnostima kluba.
- (4) Ukoliko mentor kluba odobri aktivnost kluba, ista mora biti odobrena i od strane SAC-a.

- (5) Mentor je obavezan da obavljuje vannastavne aktivnosti i verificira njihovu ispunjenost i angažman članova na administrativnom modulu dostupnom na *Student Information Systemu*.

Član 13.
(Dodjeljivanje bodova)

Za aktivnosti koje su uspješno izvršene, odobrene i za koje je blagovremeno i uredno dostavljen izvještaj i dokaz, Univerzitet dodjeljuje bodove studentima prema pravilima o stipendiranju i drugim internim aktima Univerziteta. U slučajevima kada nije ispoštovan statut kluba, ovaj pravilnik ili uputstva SAC- a, Univerzitet zadržava pravo da ne izvrši dodjelu bodova.

V. PRELAZNE I ZAVRŠNE ODREDBE

Član 14.
(Tumačenje)

- (1) Za tumačenje odredbi ovog Pravilnika nadležan je Senat Univerziteta.
- (2) Stručne službe Univerziteta pružaju pomoć Senatu pri tumačenju pojedinih odredbi ovog Pravilnika.

Član 15.
(Stupanje na snagu)

Pravilnik stupa na snagu danom donošenja, a izmjene i dopune ovog Pravilnika vrše se na način i po postupku propisanim za njegovo donošenje.

Broj: 01- 164-1/22
Sarajevo, 25.05.2022. godine

PREDSJEDAVAJUĆI SENATA
Prof. dr. Mersid Poturak

Dostavljeno:
3x Fakulteti
1x Studentski parlament
1x a/a